



Istraga SIPA-e i partnerskih agencija u predmetu Zijad Turković i drugi rezultirala kaznom zatvora od ukupno 124 godine i šest mjeseci za zločinačku organizaciju



Dugogodišnja istraga policijskih službenika Državne agencije za istrage i zaštitu (SIPA) i drugih partnerskih agencija u Bosni i Hercegovini rezultirala je izricanjem prvostepene presude Suda BiH u predmetu Zijad Turković i drugi, kojom je pet optuženih u ovom predmetu jučer, 28.11.2013. godine, osuđeno na kaznu zatvora u trajanju od ukupno 100 godina, dok je, kada je započet glavni pretres 2011. godine, sedam osoba sklopilo sporazum o priznanju krivice sa Tužilaštvom BiH, za što su ukupno presuđeni na 24 godine i šest mjeseci zatvora.

Zijad Turković je na području Sarajeva od 2006. godine organizirao i rukovodio zločinačkom organizacijom, koja je na području Bosne i Hercegovine i susjednih država počinila veći broj krivičnih djela neovlaštene trgovine narkoticima, krivičnih djela protiv života i tijela, razbojništava, neovlaštenog prometa vojnom opremom, iznuda, pranja novca i drugih teških krivičnih djela, pri čemu su pripadnici organizacije imali konkretna zaduženja i bili odgovorni lično njemu.

SIPA je 2007. godine započela rad na ovom predmetu prikupljajući relevantna operativna saznanja, s ciljem otkrivanja i rasvjetljavanja do tada počinjenih teških krivičnih djela i privođenja njihovih počinilaca pred nadležne pravosudne institucije.

Imajući u vidu činjenicu da se radi o najvećoj zločinačkoj organizaciji u postdejtonskoj BiH, istraga u ovom predmetu je kasnije vođena pod nadzorom glavnog tužioca Tužilaštva BiH i šefa Odjela za organizirani kriminal, privredni kriminal i korupciju Tužilaštva BiH.

Nakon što je SIPA, 21.10.2010. godine, lišila slobode glavnoosumnjičene osobe u ovom predmetu, odlukom glavnog tužioca Tužilaštva BiH naređeno je formiranje zajedničkog istražnog tima, koji su sačinjavali tužioci Tužilaštva BiH, Tužilaštva Kantona Sarajevo, te policijski službenici SIPA-e, MUP-a Kantona Sarajevo i FMUP-a

Tokom iscrpljujućeg višegodišnjeg rada na ovom predmetu, SIPA je Tužilaštvu BiH podnijela 18 izvještaja o počinjenom krivičnom djelu i izvršiocima protiv ukupno 27 osoba, osumnjičenih da su počinile krivična djela kao članovi organizirane kriminalne grupe ili za organiziranu kriminalnu grupu Zijada Turkovića. U okviru tih aktivnosti rasvjetljeno je 11 krivičnih djela, pronađeno i ekshumirano pet tijela, žrtava navedene organizirane kriminalne grupe. SIPA je, za vrijeme rada na ovom predmetu, slobode lišila 21 osobu, a 18 osoba je predato na dalju nadležnost Tužilaštvu BiH i Sudu BiH, od kojih je šest osoba dobilo imunitet u zamjenu za svjedočenje u postupku, a jedna osoba je uključena u program zaštite svjedoka.



Istraga predvođena Tužilaštvom BiH u predmetu Zijad Turković i drugi trajala je devet mjeseci. Tužilaštvo BiH je pred Sudom BiH podiglo optužnicu protiv 14 osoba, a optužnica je potvrđena 17.6.2011. godine.

Glavni pretres započeo je 16.8.2011. godine, kada je sedam osoba sklopilo sporazum o priznanju krivice sa Tužilaštvom BiH, za što su ukupno presuđeni na 24 godine i šest mjeseci zatvora.



Nakon okončanog sudskog postupka, izrečene su osuđujuće presude za još pet optuženih osoba, i to kazna zatvora u trajanju od 40 godina za Zijada Turkovića, kazna zatvora u trajanju od 40 godina za Milenka Lakića, kazna zatvora u trajanju od 12 godina za Sašu Stjepanovića, kazna zatvora u trajanju od pet godina za Fadila Aljivića i kazna zatvora u trajanju od tri godine za Muamera Zahitovića.

Ističemo da su tokom rada na ovom predmetu angažirani svi kapaciteti SIPA-e. U okviru istrage saslušan je veliki broj svjedoka i osumnjičenih osoba, vršeni su pretresi objekata i osoba. Također, provedena je finansijska istraga, preduzimane su posebne istražne radnje, te je angažiran Odjel za zaštitu svjedoka SIPA-e koji je provodio program zaštite zaštićenog svjedoka u ovom predmetu.

U toku rada na dokumentiranju kriminalnih aktivnosti ove organizirane kriminalne grupe, SIPA je ostvarila visok nivo policijske i druge međuinstitucionalne saradnje na nivou Bosne i Hercegovine, kao i sa zemljama Zapadne Evrope, u okviru čega prednjači SR Njemačka. Veliku pomoć u istrazi pružili su stručnjaci njemačkog Landeskriminalamta Vestfalen, koji su izvršili precizna mjerenja u Cargo centru na Međunarodnom aerodromu Sarajevo, kada je utvrđena visina četvorice tada nepoznatih izvršilaca krivičnog djela razbojništva, te pružili asistenciju prilikom obavljanja razgovora sa svjedocima na području Njemačke. Također, u radu na ovom predmetu ostvarena je veoma dobra saradnja sa Evropskom policijskom misijom u BiH (EUPM), posebno u prvobitnoj istrazi u predmetu "Cargo", koji se tiče razbojništva na Međunarodnom aerodromu Sarajevo.

Svakodnevna saradnja ostvarivana je i sa policijama zemalja iz regiona, prvenstveno sa MUP-om Republike Srbije i MUP-om epublike R.Hrvatske, u okviru koje je izvršen veći broj operativnih provjera i saslušan veliki broj svjedoka.

Saradnja sa pomenutim državama i dalje traje i svakim danom donosi nove rezultate u smislu dokazivanja krivičnih djela, te potvrđuje ulogu SIPA-e kao lidera među policijskim agencijama u Bosni i Hercegovini i prvog partnera kada je u pitanju međunarodna policijska saradnja.

Napominjemo da je organizirana kriminalna grupa Zijada Turkovića dugi niz godina djelovala na području Bosne i Hercegovine, svakodnevno vršeći krivična djela, na osnovu čega je stekla veliku imovinsku korist i ostvarila uticaj na strukture vlasti (od lokalnog do državnog nivoa), pojedince iz poreskih, policijskih i pravosudnih institucija, medija, advokatskih i notarskih komora i druge, što ju je pretvorilo u jednu od najorganiziranijih



kriminalnih grupa, i svakim danom je jačala, ističući se u surovosti i beskrupulozности, te prijetila da se izdigne iznad sistema i nanese ozbiljne posljedice po sigurnost građana i društva u cjelini.

Uspješnom realizacijom ovog predmeta zadat je jak udarac organiziranom kriminalu na području Bosne i Hercegovine, te su rasvijetljena monstruoza krivična djela koja su počinili pripadnici ove kriminalne grupe.

Rezultat svih provedenih aktivnosti su ukupno izrečene 124 godine i šest mjeseci zatvora za sve osobe koje su na osnovu optužnice, odnosno sklopljenog sporazuma sa Tužilaštvom BiH, osuđene u ovom sudskom postupku.

Posebno je bitno istaći da su presude koje su izrečene organizatoru Zijadu Turkoviću i njegovom saradniku Milenku Lakiću, do sada najveće kazne zatvora za krivična djela organiziranog kriminala, što je poruka građanima da vladavina zakona živi u BiH, te da agencije za provođenje zakona efikasno rade svoj posao.